

13. okt 2014

Võrokeelitside koorilaulõ võigõlusõlõ tull' 27 tüüd

Seo keväjä välläkuulutõdulõ võrokeelitside koorilaulõ ja -säädide konkursilõ tull' 27 tüüd. Hindajidõ kogo tege uma otsussõ novvembri alostusõs ja osavõtjõt tennätäs ja parõmba' saava' avvuhinna' 29. novvembril Kanepi seltsimajan Kanepi segakoori 130 juubõlil. Konkursitõie hulgast loodõtas löödä vahtsõt võrokeelist lauluvarra, muuhulgan ka 2016. aastagal peetävä neländä Uma Pido jaos.

Seo aastaga keväjä pääle nakanu võrokeelitside koorilaulõ ja –säädide konkursilõ tull' tähtaos (23. sept 2013) 27 tüüd. Kolm 3 hääd võrokeelist teksti omma' saanu vahtsõ viie ja koorisääde ja 24 joba olõman laulu vai rahvalaulu omma' saanu vahtsõ sääde. Kõgõ inämb miildüs tegejile kirota segakoorilaulõ – noid tull' konkursilõ 19, a om ka 4 miihikoorilaulu, 1 latsikoorilaul ja 3 naisikoorilaulu.

Säänest konkurssi tetä-i edimäst kõrda – inne tõist võrokeelist laulupito kõrraldõdi niisamatõ konkurss ja tõid tull' tuukõrd 17, minkast katsat ka 2010. aastagal Põlvan olnu II Umal Pido ka laulõti. Inne kolmandat võrokeelist laulupito olnu konkursilõ tull' sarnatsõlt seo konkursiga 27 tüüd. Noist 5 laulõti 2013. aastagal olnu kolmandal pidol Võrol. Ka mitmõ' tõsõ' laulu' omma' löüdnü uma kotussõ kuurõ lauluvaran – katõ varatsõmba konkursi matõrjalõ päält anti 2013. aasta sügüse vällä võrokeeline koorilaulik „Om laul, miä kokko kõüt“.

Hindajidõ kogo, kon omma' viiemeistri Piret Rips Laul, viiemeistri ja dirigent Riivo Jõgi, rahvamuusik Ott Kaasik nink dirigendi' Silja Otsar ja Saidi Tammeorg tege uma otsussõ novvembrikuu alostusõs. „Hää om tuu, et kõigi hindamiskogo liikmide juurõ' vai kodokotus omma' määnestkipiten vanal Võromaal, nii ei olõ näist kellelegi ka laulõ tõlki vaia“ arvas' Uma Pido projektijuht Triinu Ojar.

Konkursi avvohinnafond om 3000 eurot ja tuud omma' tugõnu Eesti Kultuurkapitali rahvakultuuri sihtkapital, Võro ja Põlva ekspertgrupi', Võro vallavalitsus, kultuuriministeeriumi Vana Võromaa kultuuriprogramm, Põlvamaa umavalitsuisi liit ja Võro Selts VKKF. Ossavõtjõt tennätäs ja parõmbit avvohinnatas märdikuun. Vahtsõl aastagal imäkeelepäävä (14. märdsi) paiku om kavan koorikontsõrt, kon laulõtas võigõlusõlõ saadõtuid laulõ.

Võrokeelitside laulu- ja rahvapidodõ muud sai alostusõ 2008. aastagal, ku Võrol oll' edimäne pido, 2010 oll' Põlvan tõnõ pido ja 2013. aastagal kolmas pido jäl' Võrol. Neläs pido tulõ 28. mail 2016 Põlvan. Uma Pido om terve vana Võromaa ja timä katsa kihlkunna rahva umakeeline laulupido, kon oltas rõõmsa uma rikka kultuuriperändüse ja ummamuudu ilmakaemise üle.

Teedüst saa mano:
Triinu Ojar
Uma Pido projektijuht
533 22 153
www.umapido.ee